

REZOLUCIJA O POLITIČKIM OPREDJELJENJIMA SDP BiH

Polazeći od Programa Socijaldemokratske partije Bosne i Hercegovine koji nedvosmisleno i jasno nudi viziju Bosne i Hercegovine kao moderne, demokratske države jednakih prava i prilika za sve njene građane, bez obzira na njihov socijalni status, etničku, religijsku, spolnu ili dobnu pripadnost

Svjesni nedostataka ustavnog sistema kojim je država podijeljena i razvlašćena na račun entiteta i etničkih grupa kojima se daju prava koja u demokratskim državama pripadaju građanima,

Podsjećajući na veoma značajnu političku ulogu koju je Socijaldemokratska partija imala u protekle 102 godine svoga postojanja, a prije svega na prevladavanju mononacionalnog karaktera političkog organizovanja i međunacionalnog polariziranja i konfrontiranja, te borbi protiv fašizma,

Ne zaboravljajući da smo kao stranka osnovani kao izraz političkih potreba radničke klase, a radi zaštite interesa svih onih koji žive od svoga rada i znanja,

Ostvarujući kontinuitet djelovanja na jačanju državnosti Bosne i Hercegovine, te zalažući se za jednak boljitak i dobrobit svih njenih građana,

Iskazujući spremnost na politički dijalog kao alat za postizanje šire saglasnosti o koracima za unaprjeđenje stanja u Bosni i Hercegovini,

Ističući svoje puno opredjeljenje za poštivanje različitosti i ravnopravnosti, kao i očuvanje nacionalnog identiteta svakog naroda i nacionalnih manjina,

Ponosni na istinsku multietničnost koju smo odlučni braniti i njegovati kao vrhunsku vrijednost i obilježje Socijaldemokratske partije Bosne i Hercegovine,

Imajući u vidu izuzetno kompleksnu političku situaciju u zemlji, a posebno upitne namjere dezintegrirajućih politika i njihovih zagovornika,

Mi, delegati 2. Vanrednog Kongresa Socijaldemokratske partije Bosne i Hercegovine, 29.10.2011. godine u Sarajevu, donosimo:

REZOLUCIJU O POLITIČKIM OPREDJELJENJIMA SDP BIH

1. Izbori i implementacija izbornih rezultata

- Rezultati Opštih izbora 2010. godine su pokazali da su građani odlučili Bosni i Hercegovini dati šansu da postane država razvijene demokratije u kojoj će glasači sve dominantnije davati podršku pozitivnim rezultatima rada, konkretnim politikama i kvalifikovanim kandidatima koji su ih sposobni provoditi, umjesto skupinama ljudi koji, samoprolašavajući se zaštitnicima interesa bilo kog naroda, najgrublje manipulišu nacionalnim osjećanjima i realnim strahovima građana, a sve kako bi sebi osigurali upravljanje javnim resursima bez ikakve odgovornosti i straha od kazne.
- Princip prisvajanja prava kolektiviteta, kao i ekskluzivnog zastupanja istog, od strane političkih stranaka ili pojedinaca, neprihvatljiva je pojava nepoznata u demokratskim društvima. U tom smislu i bosanskohercegovačko društvo treba odbaciti pokušaje da takve politike dominiraju političkom scenom i provode diskriminatorne i nedemokratske prakse.
- SDP, kao stranka koja zastupa interese naroda i građana Bosne i Hercegovine, ustrajat će u namjeri da bude konstruktivni faktor ukupnog političkog sazrijevanja u našoj državi, koje će rezultirati time da se politički rad sa konkretnim rezultatima smatra najvećom vrijednosti na osnovu koje se dobiva ili gubi povjerenje građana.

- SDP odbacuje nakaradnu i opasnu praksu dijela političkih stranaka da otvaraju pitanje nacionalnih problema kad god nisu u stanju da rješavaju životne probleme običnih građana ili kad god su nezadovoljni svojim izbornim rezultatom ili položajem u vlasti.
- SDP BiH će njegovati odnos uzajamnog povjerenja prema partnerima u vlasti sa kojima dijeli odgovornost za provođenje reformi i uspostavu pravednijeg i bogatijeg društva, u mjeri i na način kako se oni budu odnosili prema provođenju zajednički utvrđenih programskih načela i smjernica, jednako kao i na osnovu njihovog odnosa prema državi Bosne i Hercegovine, a u svjetlu SDP-ove vizije.
- Kongres pozdravlja sve do sada realizovane aktivnosti Glavnog odbora SDP BiH, kao i svih drugih organa i tijela SDP BiH na svim nivoima organizovanja, na utvrđivanju političkog okvira za proces implementacije izbornih rezultata.
- Kongres podržava napore Predsjednika SDP BiH i drugih članova partijskog rukovodstva u procesu uspostave vlasti, pozitivnim ocjenjuje dosadašnje rezultate, te daje punu podršku nastavku ovih aktivnosti zasnovanih na jasno utvrđenim principima.
- Za SDP, vršenje vlasti nije i nikada neće biti samo po sebi cilj, nego isključivo način da se što potpunije i efikasnije provedu politike koje su dobile veliko povjerenje građana.

2. Bosna i Hercegovina 2020.

- Bosna i Hercegovina se mora nastaviti izgrađivati kao suverena, demokratska, pravna i sekularna država u postojećim, međunarodno priznatim granicama, kao država zasnovana na temeljnom principu jednakopravnosti svih na svakom pedlju njene teritorije, najpotpunije definisanom na Prvom zasjedanju ZAVNOBiH-a.
- SDP BiH, kao politička stranka svih državljana Bosne i Hercegovine, opredijeljena je za jednak razvoj svih dijelova naše domovine. U tom smislu, ekonomske, obrazovne, sportske, kulturne i druge uspjehe bilo koje regije, teritorijalne ili administrativne jedinice unutar Bosne i Hercegovine SDP smatra jednako važnim za državu u cjelini.
- Država treba funkcionirati na način da se običan čovjek i njegovi problemi nalaze u fokusu pažnje i predstavljaju prioritet za rad državnih organa.
- Želimo izgraditi Bosnu i Hercegovinu kao zemlju u kojoj je pravo na rad neprikosnoveno, državu u kojoj je radnička klasa iz godine u godinu jača, brojnija i organizovanija.
- Poštujući antifašističku i ljevičarsku tradiciju naroda Bosne i Hercegovine, nastavljamo baštiniti najsvjetlije tekovine iz naše prošlosti, svjesni da je fašizam na ovim prostorima mnogo puta pobijeđen, ali nikada do kraja iskorijenjen. Borba protiv svih oblika fašizma, radikalizma i **terorizma** je naš kontinuirani zadatak.
- Institucionalna jednakost svih konstitutivnih naroda, ostalih i građana na svakom pedlju države neupitan je cilj SDP-a, vrijedan svake političke borbe i cijene koju u toj borbi treba platiti.
- Kolektivna prava trebaju uživati poziciju utvrđenu Ustavom, te moraju postojati precizni mehanizmi za zaštitu istih. Istovremeno, kolektivna prava ne smiju ugrožavati prava bilo kojeg pojedinca.
- SDP, kao dokazana partija čitave BiH, svih njenih naroda i građana, na sve raspoložive načine će se suprotstaviti svim pokušajima rušenja ustavno-pravnog poretka, nasrtaja na državnost, te spriječiti bilo kakve prijetnje po stabilnost Bosne i Hercegovine kao međunarodno priznate države u postojećim granicama.
- Uporno insistiranje na etničkoj federalizaciji države, pa čak i konfederalnom uređenju, jednako kao i istovremeno zagovaranje unitarizacije Bosne i Hercegovine predstavljaju realnu političku opasnost, kao i podlogu za eventualne sukobe.
- Nezavisan i efikasan pravosudni aparat, u saradnji sa profesionalnom i produktivnom policijom predstavlja garant sigurnog društva u kojem je neupitna vladavina zakona.
- Borba protiv kriminala i korupcije, obilježena potrebnim zakonskim rješenjima i vidljivim rezultatima, mora biti jedan od prioriteta pravaca djelovanja svih organa vlasti, što će kao rezultat, pored ostaloga, imati i povećanje povjerenja građana u institucije vlasti.

- Naša vizija Bosne i Hercegovine isključuje sada prisutne destruktivne političke snage koje organizovano i sistematski nastoje postići predratne i ratne ciljeve, a prije svega podjelu zemlje i stvaranje etničkih država.
- Na vještački stvorenu dilemu „građansko ili nacionalno?“, SDP ima jasan odgovor: „i građansko i nacionalno!“.
- Naš cilj je izgraditi državu koja će institucionalno biti u stanju zaštititi pravo svakog pojedinca da bude ono što sam izabere i da, što god da je taj izbor, bude ravnopravan sa svima ostalima, sve dok je to u skladu sa zakonima Bosne i Hercegovine. Sloboda u izboru da budemo drugačiji od većine je vrijednost za čije se poštivanje borimo.

3. Ustavne promjene

- Neophodnost ustavnih promjena u Bosni i Hercegovini niko ne može dovesti u pitanje. Slijedeći primjer drugih država koje su na svom putu mijenjale neadekvatne dijelove svojih ustavnih rješenja, i Bosna i Hercegovina mora biti spremna na reformu Ustava.
- Promjena Ustava se ne treba posmatrati kao poligon za političke sukobe, nego isključivo kao „alat“ za približavanje Evropskoj Uniji i NATO-u, dalju demokratizaciju Bosne i Hercegovine, promjenu sistema vrijednosti, te za lakše i učinkovitije upravljanje državom.
- Korekcije postojećeg ustavnog rješenja se trebaju realizovati u više faza, završno sa onima promjenama koje će omogućiti stvaranje efikasne državne strukture. Pri tome, politički dijalog treba uvažavati kao vrhunsko demokratsko dostignuće.
- Prvi korak ustavnih promjena treba da predstavlja eliminaciju diskriminacija iz Ustava Bosne i Hercegovine. **Ispunjavanje presude Evropskog suda za ljudska prava u slučaju „Sejdić - Finci protiv Bosne i Hercegovine“ ne smatramo samo obavezom koja proističe iz sudske odluke, nego i uslovom za izgradnju demokratskog, otvorenog i pravednog društva u Bosni i Hercegovini.**
- Kroz drugu fazu ustavnih reformi, potrebno je obezbijediti stvaranje državne strukture, sposobne da donosi odluke i odgovori na sve zahtjeve koje će pred Bosnu i Hercegovinu biti postavljeni u procesu pristupanja Evropskoj Uniji i NATO-u.
- Ostale faze reforme ustava proistat će iz procesa pridruživanja EU i NATO-u, kao i iz potrebe za efikasnijim i efektivnijim upravljanjem državom, te potrebom za daljom demokratizacijom društva.
- Kongres reafirmiše stavove definisane kroz „Rezoluciju o ustavnoj reformi“ koja je usvojena na 5. Kongresu SDP BiH.

4. Evropski put Bosne i Hercegovine

- Evropski put Bosne i Hercegovine nema alternativu.
- Reformski procesi koji stoje pred nama kao uslov pridruživanja Evropskoj Uniji, ma koliko bili zahtjevni i bolni, trebaju biti na vrhu liste prioriteta vlasti na svim nivoima.
- Bosna i Hercegovina mora biti sposobna i imati kapacitete da samostalno ispunjava uslove za pridruživanje EU.
- Ničiji lični interes, interes grupe ljudi ili interes teritorijalne jedinice unutar Bosne i Hercegovine ne može biti na štetu drugih ljudi, a posebno ne može biti ispred interesa države, što se odnosi na širi kontekst, a posebno na proces pristupanja EU.

5. NATO – osjećaj sigurnosti

- Bosna i Hercegovina, uz maksimalno zalaganje predstavnika vlasti, može postati punopravni član NATO-a do obilježavanja 100-te godišnjice početka Prvog svjetskog rata.
- Osjećaj sigurnosti za sve građane Bosne i Hercegovine, ali i inostrane investitore je veliki benefit koji naša država dobiva članstvom u NATO-u, te više nego dovoljan poticaj da se uloži veliki napor u ostvarivanju ovoga cilja.

- SDP podržava jačanje vojne saradnje u svrhu učešća u mirovnim vojnim i sigurnosnim misijama, u antiterorističkim operacijama i borbi protiv organizovanog kriminala, kao aktivnostima vezanim za uključenje u euro-atlantske integracijske mehanizme i procese.
- Smatramo da stabilnost u regiji predstavlja veoma važno političko, ali i sigurnosno pitanje, te da napori da se ojača mir, razvije demokratija, osnaže i poštuju ljudska prava, te osigura ekonomski prosperitet regije nemaju alternativu.

6. Demokratizacija BiH

- Bosna i Hercegovina treba postati država sa jakom parlamentarnom demokratijom koja diktira političke procese.
- Opredijeljeni smo za temeljnu moralnu obnovu društva, štiteći istovremeno pravo svakog pojedinca da svoj svjetonazor gradi u skladu sa vlastitim opredjeljenjem, jednako kao vjernik ili ateista.
- Davanjem podrške radu vjerskih zajednica izražavamo svoje razumijevanje značajne javne uloge koju vjerske zajednice imaju u moralnom odgoju, afirmiranju humanizma i etike dobra, humanitarnim aktivnostima i sl., uz naglasak na tome da je religija i izbor religije dio privatnosti svakog pojedinca. Istovremeno, SDP će insistirati na univerzalnom civilizacijskom principu obostrane razdvojenosti države i vjerskih zajednica. Nastavit ćemo snažno osuđivati i suprotstavljati se političkoj zloupotrebi religije i vjerskih zajednica.
- Civilni sektor od strane SDP-a ostaje prepoznat kao partner u izgradnji modernog evropskog društva unutar Bosne i Hercegovine, te ističemo svoju opredijeljenost za još intenzivnijom saradnjom.
- Otvorenost SDP-a za sve pojedince, neformalne grupe, organizacije civilnog društva, ali i političke stranke, koji smatraju da na programu SDP-u mogu pomoći u izgradnji Bosne i Hercegovine, predstavlja neupitno opredjeljenje.
- SDP poziva na nastavak procesa okrupnjavanja političke scene, te podržava udruživanje više stranaka sličnih programskih opredjeljenja.
- SDP smatra slobodne, profesionalne i nezavisne medije važnim elementom demokratizacije društva.

7. Međunarodna politika SDP-a i odnos prema susjednim državama

- Kongres pozdravlja dosadašnje uspjehe SDP-a na međunarodnoj sceni, posebno one koji su rezultat aktivnosti u socijalističkim i socijaldemokratskim asocijacijama, a prije svega u Socijalističkoj Internacionali i Partiji Evropskih Socijalista, te daje punu podršku nastavku ovih aktivnosti.
- Uspješna saradnja sa sestrinskim partijama iz cijelog svijeta, zasnovana na međusobnoj podršci i razmjeni iskustava, predstavlja komparativnu prednost SDP-a u odnosu na ostale političke subjekte u BiH.
- Ulaskom Bosne i Hercegovine u Vijeće Evrope učinjen je prvi korak u integracijskim procesima. Aktivnosti vezane za dalje prestrukturiranje i osposobljavanje Bosne i Hercegovine za integriranje u EU i NATO predstavljaju prioritetne aktivnosti u pogledu opredjeljenja spram vanjske politike BiH.
- SDP se zalaže za odnose, prije svega sa susjedima, koji će se bazirati na punoj ravnopravnosti i uvažavanju pune državnosti Bosne i Hercegovine i na punom poštovanju teritorijalnog integriteta i suvereniteta, što smatramo osnovnim preduslovom za puni demokratski razvoj regije i njeno uključenje u evropske i svjetske tokove.

Sarajevo, 29.10.2011.